

**Nunatsinni avatangiisinut aningaasaateqarfimmik pilersitsinissaq sulissutigeqqullugu
kiisalu Inatsisartut aningaasanut inastisaanni konto 24.11.23-mi naatsorsuutit,
nukissiornermi ikummatissanut avatangiisit pillugit akitsuutikkut isertitat avatangiisinut
aningaasaateqarfimmut atugassanngorlugit immikkoortinneqartalernissaat
sulissutigeqqullugu Naalakkersuisut peqquneqarnissaannik Inatsisartut
aalangiiffigisassaattut siunnersuut
(Saaq. Siumumi Inatsisartunut ilaasortaaitat)**

pillugu

Eqqissisimatitsinermut Avatangiisinullu Ataatsimiititaliap

ISUMALIUTISSIISSUTAA

Siunnersuutip aappassaaneernissaanut tunniunneqartoq

Suliarineqarnerani Ataatsimiititaliami kingullermik uku peqataapput:

Inatsisartunut ilaasortaq Saxtorph Didriksen, Siumut, siulittaasoq

Inatsisartunut ilaasortaq Lars P. Mathæussen, Siumut, siulittaasup tullia

Inatsisartunut ilaasortaq Hans Enoksen, Siumut

Inatsisartunut ilaasortaq Sara Olsvig (Ove Karl Berthelsen, sinniisussaq), Inuit Ataqtigiit

Inatsisartunut ilaasortaq Naaja Nathanielsen, Inuit Ataqtigiit

Ulloq 8. oktober 2013 UKA 2013-imi siullermeerneqareermat Ataatsimiititaliap siunnersuut sukumiinerusumik misissorpaa.

Siunnersuutip imaa aamma siunertaa

Siunnersuuteqartup aalajangiiffigisassatut siunnersuutimigut kissaatigaa, Kalaallit Nunaanni avatangiisinut immikkut aningaasaateqarfimmik pilersitsoqarnissaa aamma aningaasanut inatsimmi konto pingaarneq **24.11.23 Nukissiornermi ikummatissat avatangiisinut akitsuutaat** aningaasaateqarfimmik tigussaasumik aningaasalersuissasoq.

Siunnersuuteqartup aalajangiiffigisassatut siunnersuummi taavaa, avatangiisinut aningaasaateqarfiup avatangiisinut akitsuutit avatangiisinik pitsanngorsaanermut suliniutinut atorneqarnissaat isumannaarneqassasoq, taamaalilluni siunnersuuteqartup taasaatut,

“avatangiisinut aningaasaateqarfimmik pilersitsinitsigut kommuninut innuttaasunullu eqqakkat avatangiisinut navianaatillit pitsaanerusumik passunneqartarnissaat kiisalu avantangiisinut eqqummaarinnerusumik pissusilersornermut tunngasunik politikikkut piumasagaatit naammassisarnissai ajornannginnerusumik angusinnaalissavagut. Avatangiisinut aningaasaateqarfiup aningaasaataanik atuineq maleruagassanik aalajangersakkanik tunngaveqartumik ingerlanneqassaaq, imatullu assersuutigalugu atuisoqarsinnaassaaq: imip atoriikkap kuutsitap salinneqarnissaanut tapiissutinut, eqqakkanik ikuallaaviit ingerlanneqarnerannut tapiissutinut, pinngortitaq pillugu ilisimatusarnernut tapiissutinut, paasisitsiniaanernut kiisalu pinngortitaq avatangiisillu pillugit oqallinnernut aammalu allanut issittumi avatangiisitsinnut innarlujasumut tunngatillugu suliniutinut tapiissutinut.”

Siunnersuutip Inatsisartuni siullermeerneqarnera

Avatangiisit pillugit sulissuteqarnerunissaq innersuussutigalugu Naalakkersuisut akissuteqaatiminni siunnersuut akuerisassanngorlugu inassutigaat. Tamatumani assersuutigalugu pineqarput uuliaarluertoqarnissaanut upalungaarsimaneq, eqqagassalerineq imermillu errortuivikumik saliisarneq.

Siumup, Atassutip aamma Partii Inuit tamarmik siunnersuut tapersersorpaat. Inuit Ataqtigiit siullermeerinermi siunnersuut tapersersorsinnaanngilaat, siunnersuummullu allannguutissatut siunnersuut una saqqummiullugu:

“Kingusinnerpaamik august 2014 nallertinnagu Inatsisartunut agguaanneqartussamik oqaaseqaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Avatangiisinik aqutsinerput sukannernerulerseqqullugu oqaaseqaammi allaatigineqassapput avatangiisit pillugit suliniutit suut aningaasaliiffigineqarnisamat pisariaqartitsiffiunerpaanersut aammalu ukiuni aggersuni inatsisiliassatut suut pilersaarutigineqarnersut. Oqaaseqaat 2015-imut aningaasanut inatsisissatut siunner-suummut atatillugu tulleriiaarinermut tunulequtsiisinnaasariaqarpoq.”

Inuit Ataqtigiit siunnersuummik itigartitsinerminnut pingaarnertut tunngavilersuutigaat, akitsuutinit tigusanik siunertanut aalajangersimasunut atugassanngorlugit immikkoortisoqartarnissaa partiimit ilalerneqarsinnaanngitsoq. Taamaattorli Inuit Ataqtigiit siunnersuuteqartutulli isumaqarput, avatangiisinut tunngassuteqartutigut suli annertoqisunik suliassaqartoq.

Demokraatit isumaqarput siunnersuutikkut inuussutissarsiortut innuttaasullu immikkut akissaajartinneqassasut, tamannalu partiip isumaqatigisinnaanngikkaa. Suliniutit ujartorneqartut piviusunngortinnissaannut nunat avannaarliit suleqatigiinneranni killiliussaasunit tapiissutinik qinnuteqarsinnaaneq periarfissaasoq Demokraatit isumaqarput.

Apeqqutit

Ataatsimiititaliap siunnersuummik suliaqarnerminut atatillugu Pinngortitamut Avatangiisinillu Naalakkersuisumut apeqqutit arlallit akeqqusimavai. Pinngortitamut Avatangiisinillu Naalakkersuisup akissutaasa assilineri isumaliutissiisummut uunga tapiliunneqarput, tak. **ilanngussaq 1.**

Isumasioqatigiinneq

Ataatsimiititaliap siunnersuummik suliaqarnerminut atatillugu Pinngortitamut Avatangiisinillu Naalakkersuisumik ull. 21. november 2013 isumasioqateqarpoq, allakkatigut akissutit itisilernissaat pingaarnertut siunertaralugu. Oqaatigisanut tunngavigineqartoq isumaliutissiisummut uunga tapiliunneqarpoq, tak. **ilanngussaq 2.**

Ataatsimiititaliap siunnersuummik suliaqarnera

Ataatsimiititaliap aallaqqaammut maluginiarpa, 2013-imut Aningaasanut inatsimmi konto pingaarneq 24.11.23 Nukissiornermi ikummatissat avatangiisinut akitsuutaat pillugit allassimasoq Nukissiornermi ikummatissanut akitsuutit Nukissiornermi ikummatissat avatangiisinut akitsuutaat pillugit Inatsisartut inatsisaat nr. 21, 18. november 2010-meersoq kingusinnerusukkut allanngortinneqartoq aallaavigalugu akitsuutit uku maanna tunngavigineqartut:

- 1) Solaarit sulluunniit, ilanngullugit petruuliu, Jet A1 assigisaallu liiterimut 0,10 kr.
- 2) Fuelolie tonsimut 113,80 kr.
- 3) Motoorinut benziinat sulluunniit, ilanngullugit timmisartut orsussaat assigisaallu liiterimut 0,10 kr.
- 4) Gassit sulluunniit, ilanngullugit naturgassi, bygassi assigisaallu Nm³-mut 110,40 kr., gassili puiaasamiittoq pinnagu.
- 5) Aamarsuit sulluunniit, ilanngullugit stenkul, jordoliekoks, brunkul, qisummit usserusiat (trætjære) assigisaallu tonsimut 73,40 kr.

2012-mut Nunatta Aningaasiviata naatsorsuutai malillugit kontomi pingaarnermi pissarsiat 18,219 mio. kr.-inik annertussuseqarput. Akitsuutit taaneqartut aamma atuiffiusussatut naatsorsuutigineqartut tunngavigalugit 2014-imut pissarsiat 18-20 mio. kr.-inik annertussuseqarnissaat naatsorsuutigineqarpoq.

Paasissutissat saqqummiunneqartut Ataatsimiititaliap tusaatissatut tigusimavai. Tamanna naalakkersuinikkut isumaqataaffigineqassagaluarpat piffissap ingerlanerani avatangiisit pillugit suli akitsuusiisoqarsinnaavoq.

Siunnersuutip siullermeerneqarnerani aningaasanut inatsimmi isertitat avatangiisinut aningaasaateqarfimmut atugassanngorlugit immikkoortinneqartassanersut naalackersuinikkut isumaqatigiinngissutaavoq. Oqaatigineqarpoq immikkoortitsilluni atugassiinikkut aningaasanut inatsimmi suliaasaqarfiit sinneruttut aningaasanik atugassanik amigaateqalissasut.

Ataatsimiititaliap oqaatigissavaa, avatangiisinut artukkiutaasumik suliniutinut nioqqutissianullu avatangiisit pillugit akitsuutit mingutsitsisup akiliuteqartarnissaanik tunngavimmut atortuulersitsisusut. Avatangiisit pillugit akitsuutit avatangiisinut pitsanngorsaaitut suliniutinut atorneqartareersut avatangiisinut pitsanngorsaaitut suliniutinut aningaasalersuinissamut immikkoortinneqarlutik taamaallaat atorneqassappata, taava suliniutinut allanut amigaateqartoqalissaaq. Aappaatigulli avatangiisinut immikkoortitsilluni atugassiinikkut avatangiisinut aningaasaliisarnissaq isumannaarneqassaaq, tamannami naalackersuinikkut piumasarineqartaraluartoq siusinnerusukkut pingaarnertinneqarsimangilaq imaluunniit siunertamut atorneqartarnani. Apeqqummut 3-mut akissut innersuussutigineqarpoq, tak, **ilannugssaq 1**.

Malitsigisaanik eqqagassalerinermik kommunit akisussaaffiisa kivinnekarnissaat siunertaralugu kommuninut ataatsimoortumik tapiissutaasareersut siunertamut pisariaqartumik pingaarnersiorneqartannginneri ajornartorsiutaasutut Ataatsimiititaliap isigisinnaammagu.

Inatsimmi eqqagassat pillugit iliuusissatut pilersaarummi kingullerpaami piumasarineqartut kommunit akisussaaffimminnik malitaqarnerisa isumannaarnissaa siunertaralugu Avatangiisinut Pinngortitamullu Naalackersuisup kommuninik toqqaannartumik, ujartuilluni aamma isumaliutigilluakkamik isummersoqateqartarnerup pitsanngorsaaniarneranut Ataatsimiititaliaq isumalluarpoq.

Avatangiisitigut aningaasaliissutissatut pisariaqarnerpaat, aamma avatangiisinut akisusaassuseqarnitsinnik malinnaanissarput siunertaralugu ukiuni tulliuuttuni inatsisitigut iliuusissat pilersaarutigineqartut pillugit Avatangiisinut Pinngortitamullu Naalackersuisup nassuiaammik piaartumik suliaqarnissaa saqqummiussinissaalu Ataatsimiititaliap kaammattuutigaa.

Siunnersuutip aningaasatigut kingunerisassai.

Siunnersuutip aningaasatigut aqutsinikkullu kingunerisassai pillugit siunnersuuteqartoq siunnersuummi ima taasaqarpoq:

“Avatangiisinut aningaasaateqarfiup pilersinnissaa allaffissornikkut ingerlanneqassaaq tamannalu allaffimmiup AC-p ataatsip ukiumik ataatsimik sulineranik, tassa

aningsaanngorlugu 500.000 kr.-nik naleqassangatinneqarpoq. Avatangiisinut aningaasaateqarfiup ulluinnarni ingerlanneqarnissaa allaffissornikkut AC-t pingasut ukiumut sulinerannik, aningsaanngorlugu 1.5 mio. kr.-nik naleqassangatinneqarpoq. Avatangiisinut aningaasaateqarfiup siulersuisuinut aningaasartuutissai ukiumut 500.000 kr.-niunissaat naatsorsuutigineqarpoq, tamatumalu saniatigut ininik attartornermut allatigullu allaffissornikkut aningaasartuutinut ukiumut 1 mio. kr.-nik aningaasartuuteqassangatinneqarluni. Tassa avatangiisinut aningaasaateqarfik ukiumut 3 mio. kr.-nik aningaasartuutaasassasoq missingiunneqarpoq.

Nukissiornermi ikummatissanut avatangiisit pillugit akitsuutikkut isertitat avatangiisinut aningaasaateqarfimmu atugassanngorlugit immikkoortinneqartalernissaat soorunami allatigut isertitsitassarsiornermi sipaarteqarnissamilluunniit malitseqassaaq”

Aningaasatigut aqutsinikkullu kingunerisassat ataatsimut eqikkarlugit Ataatsimiititaliap oqaatigissavaa, avatangiisinut aningaasaateqarfik pilersinneqassappat aqutsinermut akissaajaatit tassunga attuumassutillit taava ikinnerpaatinneqassasut, taamaalluni aningaasaateqarfimmi aningaasaatit avatangiisinut siunertanut pitsaanerpaamik atornerqarsinnaassammata. Avatangiisinut Pinngortitamullu Naalackersuisup allakkatigut akissummini oqaatigaa Sanaartornermut Iluarsagassanullu aningaasaateqarfimmik aaqjissuussineq isumassarsiorfiginiarlugu, tak. **ilannugsaq 1**. Tamanna isumatusaarnerusinnaavoq. Aammattaaq Avatangiisinut aningaasaateqarfik sutigut tamatigut Avatangiisinut Naalackersuisup atuuttup oqartussaaffigilissammagu isumatusaarnertut isigineqarpoq.

Siunnersuut pillugu allakkatigut suliaqareernermi aamma isumasioqatigiittoqaqqereernerani Ataatsimiititaliap nassuerutigisariaqarpaa, avatangiisinut aningaasaateqarfik pillugu pissutsit tamarmik inaarutaasumik paasisaqarfiusimanngitsut. Taamaattorli siunnersuut Inatsisartunit akuerineqassappat avatangiisinut aningaasaateqarfimmik pilersitsinissaq siunertarlugu suliap ingerlaqqinnerani atugassatut 2014-imut Aningaasanut inatsimmi kr. 500.000-t immikkoortinneqarsimapput.

Isumasioqatigiinnermi ilisimatitsissutigineqarpoq, siunnersuut akuerineqassappat Avatangiisinut aningaasaateqarfik pillugu inatsimmut siunnersuummik UKA 2014-imut saqqummiussaqaarsinnaaneq suliap ingerlaqqinnerata malitsigilluarsinnaagaa.

Siunnersuut akuerineqassappat, suliap ingerlaqqinnerani inatsisissamik siunnersuuteqaratarnissap tungaanut kommunit/KANUKOKA-p tamakkiisumik akuutinneqarnissaat Ataatsimiititaliap kaammattuutigissavaa.

Ataatsimiititaliap inassutai.**Ataatsimiititaliami amerlanerussuteqartut Siumumeersut siunnersuut pillugu ima oqaaseqassapput:**

Siumumi amerlanerussuteqartut isumaqarput pinngortitami avatangiisitsinnullu mingutitsinerput kinguarsarneqarani suliaralugu aallartitariaqalersoq. Akisussaaffik Namminersorlutik Oqartussat kommuunillu ataatsimoorlutik minnerunngitsumillu aamma innuttaasut akisussaassusilimmik tigussillutik aallartitseqataanissaat Siumumit oqaatigerusupparput. Tassami ullumikkut avatangiisinut eqqaaginnarneq kingulissagut eqqarsaatigalugit akuersaaginnarsinnaanngilarput. Taamaattumik avatangiisinut aningaasateqarfimmik pilersitsiniarneq isumalluarfigalugu tamakkiisumillu Siumumit taperserlugu suliaasaq ingerlateqqipparput.

Ataatsimiititaliami amerlanerussuteqartut qulaani taaneqartut inassuteqarput tamanna tunuliaqutaralugu siunnersuut Inatsisartunit akuerineqassasoq.**Ataatsimiititaliami amerlanerussuteqartut qulaani taaneqartut inassuteqarput allannguutissatut siunnersuut saqqummiunneqartoq itigartitsissutigineqassasoq.****Ataatsimiititaliami ikinnerussuteqartut Inuit Ataqtigiinneersut siunnersuut pillugu ima oqaaseqassapput:****Inuit Ataqtigiit siunnersuut itigartippaat siunnersuumullu imak oqaasissaqarlutik:**

Avatangiisinut pitsannguutaasussanut iliuutsit tamaasa Inuit Ataqtigiit tunngaviummik tapersersorpaat. Siunnersuuteqartut isumaqtigaagut ukiuni aggersuni annertusisamik iliuseqarnissaq pisariaqarmat. Ajoraluartumillu siunnersuut isikkumisut itsillugu itigartittariaqarparput.

Avatangiisinut tunnagsumik aningaasaateqarfik aaqqiisinnaanngilaq

Annertusisamik iliuseqarnissaq pisariaqartinneqartupilussuuvoq. Sammisat sisamat avatangiisinut ataatsimititaliap kingullertigut eqqartugai kisiisa isigissagaanni, tassa eqqagassalerinermi nutaaliaanerusumik iliuseqalernissamik pisariaqartitsineq, sinerissap qanittuani uuliakoornermut akiuiniutissanik atortorinnerulernissamik pisariaqartitsineq, nunami saliinernut pisariaqartitsineq kiisalu ullutsinnut naleqqunnerusumik imermik kuutsitamik isumaginninnerup pisariaqartinneranik, tamakku tamaasa katikkaanni 100 millionilikkaanik arlalinnik aningaasartuuteqartoqartussaassaaq, tassa milliardip affaata missaanik.

Naalakkersuisut nalilerpaat avatangiisinut asattuussinerunissamut akitsuutit avatangiisinut aningaasaateqarfimmut ilisarnaaserlugit isertinneqartassagaluarpata ukiumut 18-20 mio. Koruunit missaanik aningaasaateqarfimmut nakkartitsisoqartarsinnaassagaluartoq. Taamaallunilu avatangiisinut aningaasaateqarfiup siunertani naammassisinnaanaviarnagu. Naalakkersuisut kommuninut akileeataannissamik naalakkiiagaluarpataluunniit pisariaqartitsineq naammassineqarsinnaanaviannigilaq. Taamaattumillu avatangiisinut aningaasaateqarfik iliuusivissamut iluaqutaatsiaannarsinnaasutut isigineqartuartaaginnassaaq. Allaallu avatangiisinut aningaasaateqarfik avatangiisinut iliuusissanut pisariaqartunut akitsorsaataaginnarlunilu kigaallassaataaginnassaaq.

Kialluunniit pisariaqartitsineq tamakkiisumik ilisimannigilaa

Inuit Ataqtigiit siullermeerinermi allanngutissatut siunnersuummik saqqummiussaagaraluarput, siunnersuutigineqartumi avatangiisinut pitsannguutaasussanut iliuusissanut tamakkiinerusumik ilisimasaqalernissaaq siunertaalluni. Soorlu tamakkiinerusumik iliuusissanik suliaqartoqartoq meeqqanut inuusuttunullu tunngatitanik inissaqarnermullu tunngasunik. Pisariaqartitsinerup qanoq angitigerpiarnera paasissallugu pisariaqarpoq. Suut iliuusissat siullinneqassappat, qanorlu akeqassava. Nalugutsigu qanoq pisariaqartitsisoqarnersoq iluaqutaanaviannigilaq pisariaqartitap ilaannamininnguanik aningaasaliisinnaasuseqartumik aningaasaateqarfiliussalluni. Periusissamut aningaasaliisoqarnissaa pisariaqarnerusoqaarput aningaasaateqarfimmik siunertaligaanngitsumik pilersitsinerminganniit. Tamakkiinerusumik ilisimasaqalerutta imaassinnaavoq Inuit Ataqtigiit aningaasaateqarfimmik pilersitsinissamik peqataarusussasut, tassa siunertaq ersarippat.

Nalunaaqutsiinerit Inatsisartut pituttussavaat

Tamaat isigissagaanni Inuit Ataqtigiit iluareqqissaanngilaat siunertanut aalajangersimasunut akitsuusiinissaaq. Iluarineruarput Landskarsip aningaasaataanik nunatsinni pisariaqartitsineq naapertorlugu atuinissamut Inatsisartut nammineerlutik tulleriiarissappata. Aalajngersimasunik suliassanik naammassinnittoqassappat sammisami periusissanik tunngaveqartoqartariaqarpoq, tassanilu aningaasartuutissat ersarissumik takuneqarsinnaasariaqassallutik. Ernummatigaarputtaaq pisariaqartitsivinnermut sanilliullugu

anigaasamininnguit Aningaasaateqarfissamut eqqartorneqartut asuli sinnassaataannartut sunniuteqalersinnaammata, suliassavillu taamaalilluni kigaallassarneqarluni.

Akisussaaffimmik oqartussaaffimmillu agguaneq ersarluttoq

Oqaluuserisap samminerani paatsuugassaajunnaarluni erserpoq kommuninut kingunerisassat ersarinngeqisut. Naalakkersuisut akissuteqaamminni oqaluuseraat aningaasaateqarfimmik ”tamakkiisumik inatsisartutigut aqutsineq”. Akissuteqaammilu tassanerpiaq aamma erserpoq ”Kommunit eqqagassalerinermi siulliullutik akisussaasuupput”. Inuit Ataqtigiit akuerisinnaanngilaat Avatagiisinut aningaasaateqarfimmik pilersitsinissaq kommunit inatsisartullu inissisimanerat ersarissumik inisseqqaartinnagu. Aningaasaateqarfik sussava, kommunit aningaasaleerusussanngippata-kommunit pisussaaffilerneqassappat, qanorlu tamassuma

Akisussaaffiit oqartussaffiillu Namminersorlutik Oqartussat Kommunillu akornanni agguataaqasut sunnerneqassappat?

Tamanna tunngavigalugu Inuit Ataqtigiit nutaamik allanguutissat siunnersuummik saqqummiussipput siullermeerinninnermi allanguutissat siunnersuutigineartumik paarlaasussamik, neriuppugullu amerlanerussuteqartunit ilalerneqarumaartoq. Tamattami kissaatigaarput nunatsinni avatangiisinut pitsaanerusumik annertusisamillu iliuseqarnissaq.

Inatsisartuni aalajangiiffisat siunnersuut, Naalakkersuisut pisussaaffilerneqassasut Nunatsinni tamakkiisumik avatangiisinut periusissamik nalunaarusiussasut. Nalunaarusiami avatangiisinut aningaasaateqarfimmik pilersitseratarsinnaaneq isummerfigineqassaaq, pilersitsinermilu aningaasaliinissamik periarfissanik ujartuissalluni.

Nalunaarusiap aamma takutissavaa avatangiisinut tunngasuni aningaasaliiffiususaaq annerpaaq, aningaasartuutissanik ukiunut tulliuttunut aamma ilanngussiviusoq. Kiisalu nalunaarusiap Namminersorlutik Oqartussat Kommunillu akornanni akisussaaffinnik agguataarineq nalilersussavaa. Nalilersuineq siunissami akisussaaffinnik agguataarinninnissamik siunnersuummik inerneqatinneqassaaq.

Nalunaarusiaq kommunit peqatigalugit suliarineqassaaq ukiamilu ataatsimiinnermi 2014 agguanneaassalluni, taamaalilluni avatangiisinut aningaasaateqarfik ukiortaami 2015-imi pilersinneqarsinnaassammat.

Ataatsimiititaliami ikinnerussuteqartut qulaani taaneqartut inassuteqarput tamanna tunuliaqutaralugu siunnersuut Inatsisartunit itigartinneqassasoq.

Ataatsimiititaliami ikinnerussuteqartut qulaani taaneqartut inassuteqarput allannguutissatut siunnersuut saqummiunneqartoq akuerineqassasoq.


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.



Saxtorph Didriksen,
Siulittaasoq



Lars P. Mathæussen



Hans Enoksen



Sara Olsvig/Ove Karl
Berthelsen



Naaja Nathanielsen



Eqqissimatitsinermut Avatangiisinullu Ataatsimiititaliaq

Ilanngussaq 1. Bilag

UKA 2013/33-mut siunnersuut pillugu. Avatangiisinut Aningaasaateqarfimmik pilersitsinissaq.

Ataatsimiititaliap siunnersuummik UKA 2013/33-mik suliaqarneranut atatillugu, immikkoortut uku akineqarnissaat ataatsimiititaliap qinnuteqaatigaa. Matuma kinguliani apeqqutit siulliullutik takuneqarsinnaapput tamatumalu kingorna akissutitaannik malitseqartinneqarput.

- 1) Piffissami 2008-121 konto pingaarneq 24.11.23 pillugu Nukissiornermi ikummatissat avatangiisinut akitsuutaanni akigitinneqartartunut soorlu konto pingaarnermi missingersuutitut taaneqarsimasunut tallimanut immikkoortiterlugit isertitatut nalunaarsorneqarsimasut nassuiaatigeqquneqarput.

11. november 2013
Sagsnr. 2013-088908
Dok. Nr. 1388360

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: ipan@nanoq.gl
www.naalakkersuisut.gl

Akissut:

Akilerartarnermut Aqutsisoqarfiup iluanaarutit pillugit makkuninnga paasissutissiinnaasimavoq, tassanilu 2008-mut, 2009-mut aamma 2010-mut kisitsisit pigineqanngillat, taakkunani akitsuusiisoqarsimangimmat.

2008-miit 2013-imut avatangiisinut akitsuutinit iluanaarutit

	2008	2009	2010	2011	2012	2013
Gassi aamma dieselolie il.il.	0	0	0	8.112.000	15.092.000	8.309.000
Uulia timmisartup orsussaa	0	0	0	6.492.000	1.102.000	933.000
Motoorinut benziina il.il.	0	0	0	1.632.000	2.025.000	286.000
Pinngortitamit gassi il.il.	0	0	0	0	0	0
Aamaruutissat il.il.	0	0	0	0	0	0
Katillugit	0	0	0	16.236.000	18.219.000	9.528.000

2013: 30. september 2013-imi kisitsisit.

Najoqqutarisaaq: 2013-imut aningaasanut inatsimmi aamma 2014-imut aningaasanut inatsisissatut siunnersuummi konto pingaarneq 24.11.23 Nukissiornermi tunisassiani avatangiisinut akitsuutit aamma Akilerartarnermut Aqutsisoqarfik.

Inatsit Inatsisartut inatsisaat nr. 21, 18. november 2010-meersoq.
tunngaviusoq:

2013-imi iluanaarutit katillugit 18-20 mio. koruuninik amerlassuseqarnissaat Akileraartarnermut Aqutsisoqarfiup maannakkorpiaq naatsorsuutigaa.

- 2) UKA 2013/33-mi kissaatigineqartutut konto pingaarneq 24.11.25-mi aningaasat avatangiisinut aningaasaateqarfimmut atugassanngortinneqassappata, siunissami Aningaasanut Inatsimmut sunniutaasinnaasut suuppat?

Akissut:

Aningaasartuutit suut siunissami aningaasaateqarfik aqputigalugu akilerneqartassanersut, aammalu anguniagassat qanoq annertutigisut siunissami suliassaqarfimmi naalakkersuinikkut siunnerfigineqarnersut apequtaassaaq.

Aningaasanut inatsimmi maannakkut atuuttumi avatangiisinut suliassaqarfimmi kontot (77.05.01, 77,05,03, 77.05.04 aamma 77.05.05) maannakkullu aningaasartuutaasartut tunngavigalugit ukiumut 15 mio. koruunit missaat, ullumikkut avatangiisinut akitsuutit aqputigalugit nunap karsianut isertartut, aammalu aningaasanut inatsit aqputigalugu suliassaqarfinnut allanut atugassatut naalakkersuinikkut pingaarnersuinermi inissinneqartartut amigaataasalersinnaapput. Avatangiisinut aningaasaateqarfik pillugu isummernissamat tunngavissiuiffiusumik suliap ingerlaqqinnerani tamanna sukumiisumik misissuiffigineqassaaq, tassungalu aningaasalersuinermi amigaataalertussap, nunap karsiani pilersinnaasup isumagineqarnissaanut isummernissaq ilaatinneqassaaq.

- 3) Siunnersuutigineqartutut Avatangiisinut aningaasaateqarfimmut tigussaasumik atugassaqarfiusussat pillugit Naalakkersuisut isumaliutersuuteqarnikuuppat, aamma Avatangiisinut aningaasaateqarfimmi pineqartut kommunit eqqagassaanut aamma avatangiisinut pissutsinut akisussaaffiinit immikkoortiterneqassappat? Siunnersuummi akissuteqaammilu taaneqarput:

- Uuliaarluernissamat upalungaarsimaneq
- Eqqagassalerineq, aamma
- Imerkik errortuivikumik saliisarneq

Peqatigitillugulu akissuteqaammi taaneqarpoq, eqqagassanik ulorianaatilinnik passussisarneq naleqqutinngitsaq, eqqaavissuarnit akuutissanik avatangiisinut seerisoqartarnera, aammalu eqqakkanik ammaannartumik ikuallaanermi silaannarmik mingutsitsisarneq unamminartuutinneqartoq.

Akissut: Siunnersuut akuerineqassappat, avatangiisinut aningaasaateqarfimmik pilersitsinissaq Naalakkersuisut sulissutigissavaat. Tassani suliagarnerup

kingunerisaanik avatangiisinut aningaasaateqarfiup atuuffissai aalajangersimasut sukumiisumik isumaliutersuutigineqassapput. Siunnersuut akuerineqassappat pissutsit taakkua misissuiffigineqassapput isumaliutersuutigineqarluassallutillu aammalu isumalluutissarpaaluit pisariaqartinneqassallutik. Kommunit akisussaaffii pisussaaffiilu eqqarsaatigalugit, eqqagassanik passussinissamut piiaanissamullu kommunit pingaarnertut oqartussaasuupput. Kommunit ilaat assigiinngitsunik peqquteqartumik suliassamik naammassinnissinnaangillat pingaarnersiuneramilu salliutitsisinnaanatik.

Taamaattumik kommunit oqaloqatigalugit qanoq iliorluta aningaasalersuinissamik naapertuuttumik nassaarsinnaanerluta misissortariaqarparput. Avatangiisinut aningaasaateqarfiup pilersinneqarneranut atatillugu kommunit kommunini avatangiisinut atortunik sanaartornissamut tapiiffigineqarnissamik qinnuteqarsinnaanerat periarfissaavoq. Avatangiisinulli Aningaasaateqarfimmi suliassaqarfiit kommunip akisussaaffiinit pisussaaffiinillu avissaartitsinertut isigineqassanngillat, kisiannili avatangiisinut aningaasaateqarfik eqqagassalerinermut aningaasaliissutinik ataatsimut isumaginninnermut tulleriarinermullu qulakkeerinnissamut iluaqutigineqassaaq. Periarfissaq taanna ilaatigut eqqagassalerinermik piffissamut naleqquttumik nunatsinni maani sukkanerusumik pilersitsisinnaanissamut iluaqutaassaaq.

- 4) Konto pingaarneq 24.11.23-mi taaneqartunit allaanerusunik avatangiisinut pitsanngoriaammik sunniuteqartussanik avatangiisinut akitsuutinik allanik Naalakkersuisut annertunerusumik isumaliutersuuteqarnikuuppat, isertitallu suut akitsuutinit taakkuningga pilersinneqarsinnaanersut imal. Pilersinneqassanersut missingerneqarsinnaava. Siunnersuuteqartup oqallinnermi taasaatut puussiat plastikiusut pillugit avatangiisinut akitsuusiisinnaaneq assersuusiullugu taaneqarpoq.

Akissut: Naamik maannakkorpiaanngitsoq, kisiannili tamatuma suliassaqarfimmi suliaqarnermi ilanngunneqarnissaa pissusissamisuussaaq.

- 5) Aqutsinikkut teknikkikkullu Avatangiisinut aningaasaateqarfiup qanoq ingerlanneqarnissaa Naalakkersuisut eqqarsaatigaat, aamma kommunit eqqagassanut aamma avatangiisinut pissutsinut akisussaaffiinit tassungalu atatillugu aqutsinermik suliaqarnermi marloqiusamik aqutsisoqannginnissaa qanoq isumannaarniarneqarpa?

Akissut: Siunnersuut akuerineqassappat, avatangiisinut aningaasaateqarfimmik pilersitsinissaaq Naalakkersuisut sulissutigissavaat. Siullermeerinermut akissuteqaammi oqaatigineqartutut suliame tassani avatangiisinut politikkimut suliassaqarfimmilu pingaarnersiulluni tulleriarinermut naalakkersuinikkut tamakkiisumik nakkutilliinermik qulakkeerisumik isumatusaartumik ilusiliinissarput pingaartinneqassaaq.

Taamaattumik ilaatigut Sanaartornermut lluarsaassinermullu Aningaasaateqarfiup, tamatuminnaga naammassinninnermi saniatigut aamma

aningaasartuutiviusunik tunngaveqartup ingerlalluartumik ilusiligaanera Naalakkersuisut isiginiassamaarpaat. Avatangiisinut aningaasaateqarfik allaffissornerinnaq teknikkilu eqqarsaatigalugit qanoq isumagineqassanersoq maannakkorpiaq oqaatigissallugu siusippallaarpoq. Apeqqut 3-mut akissuteqaammi taaneqartut, avatangiisinut aningaasaateqarfiup pilersinneqarnerani kommunit kommunimi avatangiisinut atortunik sanaartornissamut tapiissutissanik qinnuteqarsinnaanissaat periarfissaavoq. Periarfissaq taanna kommunit eqqagassanik isumaginniffissanik ullutsinnut naleqquttunik sukkanerusumik sanaartorsinnaaneranut iluaqutaassaaq, kisiannili aamma kommunit namminneerlutik eqqagassalerinermut aningaasartuutissanut aningaasaliissutinik pingaarnersiuiinermi salluutitsisarnissaannut tamanna kaammattuutaasariaqartussaangitsoq ersarippoq, naak tamanna kommunit suliassarigaluaaraat. Taamaattumik suliap ingerlaqqinnerani eqqarsarluortoqartariaqarpoq, aammalu piffissami aggersumi tamanna pillugu kommunit oqaloqatigineqartariaqarlutik.

- 6) Apeqqutip 5-ip malitsigisaanik akissuteqaammi pineqartoq *naalakkersuinikkut nakkutilliinermik tamakkiisumik qulakkeeriffiusumik pilersitsinisaq pingaartinneqassaaq* qanoq paaneqassanersoq nassuiaatigeqquneqarpoq.

Akissut:

Nunap Karsiani aningaasat pingaarnersiulluni tulleriarneqartarnerat Inatsisartuni suliarineqartarpoq, aammalu aningaasanik atuinissaq Naalakkersuisunut ilaasortamut, suliassaqarfimmi aningaasanik atuinermi Inatsisartunut, taakkulu kukkunersiuiinermut ataatsimiititaliaannut akisussaatinneqarsinnaasumut suliakkiissutigineqartarpoq. Taamaattumik suliassat taakku aningaasaateqarfippiamut siulersuisulimmut inissinneqarsinnaanngillat inissinneqartariaqaratillu. Tamanna pissutigalugu suliap ingerlaqqinnerani Sanaartornermut Iluarsaassinermullu Aningaasaateqarfiup ilusiligaanera erseqqinnerusumik isiginiarneqassaaq.

- 7) Inuit Ataqtigiinni ilaasortaataasut siullermeerinermi ima allannguutissatut siunnersuuteqarput:

"Kingusinnerpaamik august 2014 nallertinnagu Inatsisartunut agguanneqartussamik oqaaseqaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Avatangiisinik aqutsinerput sukannernerulerseqqullugu oqaaseqaammi allaatigineqassapput avatangiisit pillugit suliniutit suut aningaasaliiffigineqarnissamut pisariaqartiviunerpaanersut aammalu ukiuni aggersuni inatsisiliassatut suut pilersaarutigineqarnersut. Oqaaseqaat 2015-imut aningaasanut inatsisissatut siunnersuummut atatillugu tulleriarinermut tunulequtsiisinnaasariaqarpoq."

Allannguutissatut siunnersuummi kissaatigineqartutut oqaaseqaatit qaqugu Naalakkersuisut nassiuinnaavaat, tamatumanittaaq maanna ataatsimut aningaasaliissutigineqartartunut sanilliullugu avatangiisinut

tungasutigut siunissami aningaasalersuinissamut pisariaqartitat
nassuiaatigeqquneqarput.

Akissut: Akissuteqaammi oqaatigineqartutut pissutsit arlallit sukumiisumik
misissuiffigineqarnissaat pisariaqarpoq. Pissutsinik taakkuninnga misissuinerit
qanoq sivilutigissanersut maannakkorpiaq oqaatigineqarsinnaanngilaq.
Siunnersuut akuerineqassapat, isumalluutitik aningaasaateqarfiup
isumatusaartumik ilusilerneqarnissaanik misissueqqissaartussanik
pisariaqartitsisoqassaaq.

Kiisalu avatangiisinik suliassaqarfimmi aningaasaliinissamut
pisariaqartitsiviunerpaasunut nassuiaasiornermi isumalluutit amerlanerusut
pisariaqartinneqartussaapput. Sulineq taanna annertusussaavoq, kommunillu
qanimut suleqatigineqarnissaannik pisariaqartitsiviulluni.

Inussiarnersumik inuulluaqqusillunga



Kim Kielsen



Eqqissimatitsinermut Avatangiisinullu Ataatsimiititaliaq

Ilanngussaqaq 2. Bilag

Eqqissimatitsinermut Avatangiisinullu Ataatsimiititaliamik sisamangornermi 21. november nal. 10.00-10.45 ataatsimiittarfik 2-mi isumasioqatigiilluni ataatsimiinnissaq pillugu.

21. november 2013
Sagsnr.2013-092369
Dok. Nr. 1397136

Eqqissimatitsinermut Avatangiisinullu Ataatsimiititaliaq isumasioqatigiinnissamut aggersaavoq, UKA 2013/33 avatangiisinut aningaasaateqarfimmik pilersitsinissaq pillugu siunnersuutip oqaluuserineqarnissaa ataatsimiititaliap kissaatigalugu. Ataatsimiititaliamit ilisimatitsissutigineqarpoq isumasioqatigiinnermi ataatsimiititaliap siunnersuummut apeqqutaannut ataatsigut atsiortup akissuteqaatai 11. november 2013-imeersut aallaavineqassasut. Akissuteqaammi pissutsit arlallit itisiliiffineqarnissaat ataatsimiititaliamit kissaatigineqarpoq. Ataatsimiititaliap tapiliussatut apeqqutai (uingasumik allatat) akissutitaqartut matuma kingornani takuneqarsinnaapput.

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: apn@nanoq.gl
www.naalakkersuisut.gl

Apeqquut 1:

Apeqqutip 3-p akineqarnerani oqaatigineqarpoq, siunnersuut akuerineqassappat Avatangiisinut aningaasaateqarfiup tigussaasumik atuuffissai pillugit isumaliuteqartoqarnerusinnaasoq.

Apeqqummut 3-mut akissutit ilinnit itisileqquneqarpoq, tassungalu atatillugu kommunit pisussaaffiinum aningaasalersuinissamut Avatangiisinut aningaasaateqarfik ilapittuutaassanersoq imal. taartaassanersoq isumaqarfiginerit?

Apeqquut 1-imut akissut:

Avatangiisinut aningaasaateqarfissatut naatsorsuutigineqartoq kommunit avatangiisinut suliassaqarfimmi pisussaaffiisa aningaasalersorneqarnerinut tapertaasinnaasutut isigineqassaaq, tassami piffissap ingerlanerani suliassat isumagineqarnerisa tulleriarneqarnerisalu kingunerisaannik ullumikkut kinguaattoortoqarsimammat, kommunit peqatigalugit iliuseqarfigisariaqakkatsinnik. Taamaattumik matuma kinguliani atsiortoq aamma ajornartorsiutit taakkualu pisussaaffii pillugit pilersitsiviusumik isornartorsiuiiffiusumillu naalakkersuinikkut kommuninut oqaloqatiginnissamaarpoq. Tamatuma saniatigut Naalakkersuisoqarfiup eqqagassanut suliassaqarfimmi kommuninut nakkutilliinini, ilitsersuisarnini siunnersuisarninilu annertusarniarpa.

Apeqquut 2:

Avatangiisinut aningaasaateqarfioratarsinnaasup aqunneqarnera ingerlanneqarneralu pillugu Ataatsimiititaliap apeqqutaanut 5-imut aamma 6-imut akissutit ilinnit itisiliiffiqeqquneqarput.

Apeqquut 2-mut akissut:

Aalajangiiffigisassatut siunnersuut Naalakkersuisut suliarisarinngimmassuk, UKA 2014-imi naatsorsuutigineqartutut aningaasaateqarfiliorsinnaanermut inatsisissatut siunnersuuterpiamik saqqummiussinissaq sioqqullugu inatsisissamut piareersaataasumik annertunerusumik suliaqarnissaq pisariaqartussaavoq. Inatsisissatut siunnersuummut nassuiaatit nalinginnaasut ilaatigut aningaasaateqarfiup taamaattup aqunneqarnissaanut isumagineqarnissaanullu sukumiisunik nassuiaatitaqassaaq.

Aalajangiiffigisassatut siunnersuut akuerineqassappat, tamatumalu kingorna sulinissamut tassunga isumalluutissanik immikkut ittumik tassungalu immikkoortitanik immikkoortitsisoqassappat, ataatsimiititaliamit apeqquutit apeqquutillu allat avatangiisinut aningaasaateqarfiup pilersinneqarnissaanut ingerlanneqarnissaanullu attuumassuteqartut Naalakkersuisunit piaartumik aallartinneqassapput.

Naalakkersuisut isumaat malillugu qulaajaalluni sulinissaq taanna kommuninillu oqaloqateqarnissaq pereersimatinnagit, maannakkorpiaq tunngavissaagallartut tunngavigalugit aningaasaateqarfissap ilusissaanik aalajangiussereernissaq tulluassanngilaq.

Apeqquut 3:

Apeqquummut 7-mut akissutinnut atatillugu pissutsit misissuiffigineqarnerusussat annertussusaat aamma imarisaat annertunerusumik ilinnit itisileqquneqarput.

Apeqquut 3-mut akissut:

Siornatigut akissutaasarsimasut allakkiamilu matumani oqaaseqaatit allat saniatigut, aningaasartuutit tunngaveqartumik paasiuminartumillu, pisarnertut Nunap Karsiata naatsorsuutaanut ilaasussamik, ilaatigullu Inatsisartut Kukkunersiunerumut Ataatsimiititaliaanit nakkutigineqartussamik ilusiliinissap qulakkeerneqarnissaa pingaaruteqartorujussuusooq Naalakkersuisut isumaqarput.

Tamatuma peqatigisaanik siunissami eqqagassalerinermut suliassaqarfimmi aningaasaliissutissat pisariaqartinneqartut, sapinngisamik eqqagassalerinermut suliassaqarfimmut pilersaarutit tamarmiusut, kommunini pilersaarusiornernut ataqatigiissaagaasut aammalu suliassaqarfimmut Naalakkersuisutut akisussaasuusup inassuteqareerneratigut Inatsisartuni oqallisigineqarsinnaasut pingaarnersiunermilu ilaatinneqarsinnaasut tunngavigalugit aningaasaliissutigineqartarnissaat qulakkeerneqassaaq. Oqaloqatigiinneq taanna Naalakkersuisunit annertusiniarneqarpoq.

Kommuninik oqaloqateqarnissaq aamma eqqagassalerinermut aningaasaliissutissat aningaasalersorneqarnissaannut apeqquummik ilaqassaaq, tassungalu ilaatinneqassapput kommuninit aamma Namminersorlutik Oqartussanit akiliutissat oqimaalutarneqarneri taamatullu atuisut akiliutaasa amerlineqarsinnaanerinut apeqquut.

Apeqquut 4:

Siunnersuut akuerineqassappat Aningaasaateqarfik pillugu sulinerup ingerlaqqinneranut atugassatut 2014-imi Aningaasanut inatsimmi kr. 500.000-inik sillimmatissanik immikkoortitsisoqarsimanersoq uppersarsinnaaviuk?

Apeqquut 4-mut akissut:

Aap, suliap ingerlaqqinnissaanut atugassatut sillimmatissat 500.000 koruunit immikkoortinneqarsimmamata uppersarneqarsinnaavoq. Aningaasat Avatangiisinut Aningaasaateqarfissap isumatusaartumik ilusilerneqarluni pilersinneqarnissaanut aalajangiinissamut tunngavissarpianik suliaqarnissamut atorneqassapput, tassungalu ilanngullugu taassuma aningaasaleeriaatsinut allanut aammalu 2014-imi missingersuusiortarnermut inatsisip iluarsaanneqarnissaanut pilersaarutigineqartumut atatillugu isumaliutigineqartunut ilaatinneqarluni eqqarsaatigineqarnissaa qulakkeerneqassaaq.

Inussiarnersumik inuulluaqqusillunga



Kim Kielsen